

1. Kilometre 51 leh metre 31 a thui Bairabi leh Sairang inkar rel kawng siam mekah Bairabi leh Hortoki inkar chu rel tlan phal a ni tawh
2. Health Minister Pi Lalrinpuii chuan sorkar tharin a duan, Universal Health Care System chu Asian Development Bank (ADB) nena inremna ziah hnu-ah hman tan theih a ni ang a ti.
3. Kumin January ni 1 leh August ni 12 inkar chhung khan khuarel chhiatna avangin Mizoramah mi 42-in nunna an chan.
4. Prime Minister Narendra Modi-a'n Space Sector reforms chu ramchhung thalaiten an chhawr tangkai hle niin a sawi.

<><><>

**RAILWAY**

Kilometre 51 leh metre 31 a thui Bairabi leh Sairang inkar rel kawng zau chi siam mekah Bairabi leh Hortoki inkar chu rel tlan phal a ni tawh.

Rel tlanna atana rel kawng a him tawh leh him tawh loh endiktu, Ministry of Civil Aviation a Commissioner of Railway Safety Sumeet Singhal chuan kilometre 16 leh metre 725 a thui Bairabi leh Hortoki inkar a endikna a a thutlukna hi a siam fel a. Rel tlanna atan a him tawh a ni tih a finfiahna lehkha chu Ministry of Railways-ah Ningani khan a thehltut niin North East Frontier Railways (NFR) thuneitute chuan Zirtawpni khan thuchhuah siamin an tarlang. A endik hnu a thutlukna a siamah Summet Singhal chuan he lai rel kawng hi mihring phur leh bungraw phur rel tan zawh ngam a ni a ti a ni. NFR thuchhuah chuan Commissioner of Railway Safety hian thla hlui July thla tawp lam khan a endik hna hi a zo tawh niin an sawi a. Bairabi leh Sairang inkar rel kawng siam hna hi tun dinhmunah za zela 90 an zo tawh niin an sawi bawh a. He rel kawng hi hmun 4-ah thenin, Bairabi leh Hortoki inkar, Hortoki leh Kawnpui inkar, Kawnpui leh Mualkhang inkar leh Mualkhang leh Sairang inkar ti a then a ni a.

He lai rel kawngah hian rel bungraw phur leh mihring phur chi darkar khata kilometre 75 a chaka tlan theihna turin a him tawh niin Commissioner of Railway Safety chuan a thu thehluhah a tarlang a ni.

He tih lai hian Assam a Hailakandi district-a ruah sur nasat lutuk avangin Silchar leh Bairabi inkar rel kawng chu Hailakandi district-a Killarbak hmunah a chhia a. Ruahpui vanawn hian rel kawng inghahna lei hi hnawlin rel kawng hi metre 200 vel zeta thui a inkhai a. Hemi avang hian rel hmanga Mizoram leh ramchhung hmun dang inkalpawhna chu dan chah rih a ni a. Siamthat leh hun tur hriat a la ni lo.

<><><>

**BIOMETRIC**

Home Minister Pu K. Sapdanga chuan raltlante biometric data lak chungchangah hian Central Sorkar, Ministry of Home Affairs nen Mizoram sorkar chu an indawr tawn mek a ni, a ti.

Pu K. Sapdanga hian tun hnai a Assembly fur thutkhawma ziaka zawhna a chhanna-ah he thu hi a sawi a. Home Department-in a chhinchhiah danin, ni kumin August ni 13 thleng khan Mizoram chhunga raltlan awm zat chu 43,737 an nih thu a sawi a. Myanmar rama sipai-in mipui thlan sorkar an paihthlak avang leh chumi kal zela tualchhung indona avanga an sahimna zawnga Mizorama rawn raltlante chu mi 33,724 an ni a. Bangladesh Chittagong Hill Tracts atanga raltlan rawn lut awm mekte chu mi 2,014 niin Manipur a chi leh chi inkarfa buaina chhuak avanga rawn tlan chhia, tuna awm mekte chu mi 7,999 an nih thu Pu K. Sapdanga hian a sawi bawh.

Home Minister chuan raltlante tanpuina leh enkawlana atan hian sorkar laipui chuan cheng vaibelchhe 8 a rawn pe tawh niin a sawi a. Cheng vaibelchhe 3 chu sorkar hmasa MNF hun lai a rawn pek a ni a, tun sorkarah hian cheng vaibelchhe 5 a rawn pe leh tawh niin a sawi.

Sorkar hmasa hun lai a central sorkarin tanpuina a rawn pek chu raltlante buhfai ei tur, damdawi leh an chenna tur sakna atan te hman a nih thu leh district bawrhsapte'n anmahni enkawlana atana an lo hman ral tawh rullhna, a bik takin sorkar atanga a bathlau a buhfai an lo lak tawh rullh na'n te hman a nih thu a sawi a. Tun sorkar huna cheng

vaibelchhe 5 an dawn chu hman a la nih loh thu leh Consumer Affairs, Food and Public Distribution Ministry in buhfai an rawn pe dawn a, chu chu an mamawh dan zela sem a ni dawn a ni, a ti a ni.

<><><>

#### UHCS

Health Minister Pi Lalrinpuii chuan pawisa pe lawk lova damlote inenkawl theihna tura sorkar tharin a duan, Universal Health Care System chu Asian Development Bank (ADB) nena inremna ziah hnu-ah hman tan theih a ni ang a ti.

Tun hnai a Assembly inkhawmna MNF member Pu Ramthanmawia zawhna chhangin Pi Lalrinpuii chuan he Universal Health Care System atan hian ADB leh Mizoram sorkarin inremna a ziah hun huna hman theih tura ruahman a nih thu a sawi. Hemi atan hian sorkar hmasa hunlai atang tawh khan ADB atangin cheng vaibelchhe 1,000 puk turin ruahmanna kalpui a ni tawh a. Tuna health case ruahmanna tharah hian damdawi-ina inenkawlna senso pe lawk lova inenkawl theih tura duan a nih bakah sorkar hnathawk leh pension tawhte pawh huamtir tura ruahman a ni. Tun dinhmunah hian sorkar hmasa-in a hman Health Care Scheme hnuai-ah damlo 2,129 te bill batsak a la ni a. Heng mite bill batsak zawng zawng hi cheng vaibelchhe 9 leh nuai 84 chuang a ni.

Sorkar hmasa hunlai a health care scheme khan sawisel a hlawh nasa hle a. He ruahmanna hnuai a inziaklutte'n pawisa an chawi chung leh SDEP atangin cheng vaibelchhe 150 zet dah a ni chungin an inenkawlna senso hmu let thei lo an tamin damlo an pek theih loh bill ba khan cheng vaibelchhe 80 dawn dawn a kai hial thin a ni. Tuna Universal Health Care System duan tharah erawh hi chuan damlote'n a ba-in an inenkawltir thei dawn a, mipui mimir harsatna tam tak sukiang thei tura ngaih a ni a. Hetih lai hian mimal enkawl damdawiin thuneitu thenkhat erawh chuan sorkarin an damlo enkawlna senso an rul mai lovang tih hlauvin he ruahmanna a sorkar nena inremna siam chungchang chu ngaihtuah chian deuh ngai a an hriat thu an sawi ve thung a ni.

<><><>

#### HOMICIDE

Vawiin chawhma khan Champhai Vengthar a cheng Pi Thahleiiangi kum 54 chu a dawr chhungah thi a hmuh a ni. Pi Thahleiiangi hian chawhma inkhawm bang chu dawra thil lei tur ni a insawi-in a dawr chu hawn tirin a hemi hnu lawk hian a dawr chhungah a ruang hi va hmuh chhunzawm a ni a. A thih hun hi chawhma dar 10:30 leh 11:00 inkar vel ni a rin a ni. Pi Thahleiiangi hian a nghawng ah chem a sahna hlaim hmun hnih ah tuarin chhan hman lohvin a hmun ah a thi nghal a, Pi Thahleiiangi thattu hi he thu buatsaih a nih lai hian man ala ni lo va. Dawra a kalpui hmutu hian kawr sen a ha tih sawiin Champhai Champhai Police ten team 5-a inthen in tualthattu hi ngawrh takin an zawng mek. Hemi thilah hian MHIP Champhai Sub Headquarters chuan thuchhuah siamin, hmeichhe chak lo zawkte chung a nunna laksak thlenga kutthlaktu an dem thu tarlangin, tualthattu hi man chhuak a, a thil tihsual phu tawka a chungah hremna lekkawh ngei turin thuneitute an ngen tih an sawi.

<><><>

#### ASF UPDATE

African Swine Fever (ASF) vawk pulhri leng mekah kumina vawk pulhri darh zel venna atana vawk suat zat chu 19,130 a tling ta a, vawk thi pawh sing khat sang khat thelh a tling ta.

Animal Husbandry and Veterinary department hotute hnen atanga thu dawn danin vawiin hian district 4-ah vawk 42 a thi a, he'ng district, Aizawl, Lunglei, Serchhip leh Hnahthial-ah te tho hian vawk 64 suat a ni. Kumin February ni 9 a Champhai district Leithum khua a ASF hri a leng leh tan tih finfiah a nih atanga vawiin thlenga vawk thi tawh zat chu 10,850 a tling tawh. Zirtawpni khan nitina vawk thi zat hi a pung leh a, district 5-ah 193 zet a thi a. Hnahthial district a Tuipui D khua-ah ringawt vawk 110 a thi a ni a, vawk suat zat chu 92 a ni. A hma Ningani pawh khan vawk thi zat hi 140 niin suat zat hi 309 zet a tling a. Mamit district-ah ringawt vawk 219 suat a ni a, he district-a Ailawng khua-ah 98, West Phailengah 54, Saithah khua-ah 42 leh Reiek khua-ah 25 suat a ni. Vety hotute chuan Ningani a Mamit district a vawk suat zat a tam chhan hi a hma lama suat tawh, report tlai vang niin an sawi a ni.

<><><>

#### DISASTER

Kumin January ni 1 leh August ni 12 inkar chhung khan khuarel chhiatna avangin Mizoramah mi 42-in nunna an chan.

Kar kalta a Assembly inkhawma ziaka zawhna chhangin Disaster Management and Rehabilitation Minister Pu K. Sapdanga chuan nunna chan chhungte hi State Disaster Response Fund (SDRF)-in ralna pek dan tur ruahmanna a siam angin cheng nuai 4 theuhin sorkarin a ral niin a sawi a. Nunna chan hi Aizawlah district-ah tam berin mi 39 an ni a, Mamit district-ah pahnih leh Lawngtlai-ah 1 an thi bawk a ni. May ni 27 leh 28 a Cyclone Remal-in Mizoram a nuai chhung ringawt khan mi 34-in nunna an chan phah a nih kha. Cyclone Remal bakah kumin fur chhung hian ruah a tam bakah a hma atangin nasa taka rial a tlak avang leh to thli leh thlipui tleh avangin chhiatna a thleng tam a. Nunna chan bakah in sang tam tak chu rial tla, thlipui leh ruahpui vanawn avanga leiminin a hnawl a. Kawlphetha pekna ban tlu leh hrui chat vang bakah kawlpheha semchhuah a khaihak nasa a, leiminin kawng a tihpin phe chu tam tak a ni. Tlawng lui atanga tui pump chhohna khawl a chhiat avang leh tui a nut luat avangin cyclone Remal tleh atanga tun thleng hian Aizawl khawpui a tui sem dan chuan ngai a la awh thei rih ta lo a ni.

Hetih lai hian finance department lam atanga thu dawn dan chuan kum 2023-2024 tangka kum chhung atana Finance Commission 15-na in SDRF hnuai a Mizoram tana sum a rawn pek tura ruahman cheng vaibelchhe 41 leh nuai 60 a rawn pe tawh a, Mizoram sorkar pawhin a tum ve tur cheng vaibelchhe 4 leh nuai 80 chu a pe tawh bawk a, a vaiin cheng vaibelchhe 46 leh nuai 40 a ni a ti a. He sum hi hman a la ni lo niin an sawi a ni.

<><><>

#### **MANN KI BAAT**

Prime Minister Narendra Modi-a'n Space Sector reforms chu ramchhung thalaiten an chhawr tangkai hle a ni, a ti. Vawiina Akashvani-a Mann Ki Baat hun a hmanna-ah he thu hi sawiin ramchhunga thil tam tak thleng chu ram changkang siamna tur inngahna lungphum tinghettu a ni, a ti a, tun thla ni 23-ah National Space Day wavi khatna lawm a nih thu sawiin nikum hemi ni angah khan Chandrayan-3 chu thla chhim lam, Shiv Shakti point-ah hlawhtling takin a tum a ni, a ti a, India chu khawvela hetiang hlawhtlinna nei hmasa ber a ni, a ti.

Pu Modi-a chuan kumina Red Fort atanga politics nena inkungkaihna la neilo thalai nuai 1-te hnena politics kalphung hriat tum tura a ngenna chuan chhan let a hlawh thu sawiin thalai tam takin politics-a zuan luh theih hun an nghahlelh phah a ni, a ti.

<><><>

#### **UNIFIED PENSION SCHEME**

Sorkar laipui hnuaia hnathawkte pension scheme thar, Unified Pension Scheme (UPS) chu Prime Minister Narendra Modi kaihhruai, Union Cabinet chuan a pawm. Sorkar hnathawk nuai 23 velin an hlawkpui tur, UPS hnuaiah hian thil dang bakah sorkar hnathawk pension tawhte leh an chhungte hamthatna tur engemawzat a tel a, sorkar hna kum 10 thawk tlingte chu an pension hunah thla tin cheng sing 1 an la thei dawn a, pensioner chuan a thih hmian a pension pawisa zaa 60 a chhung-ten an la thei dawn a ni.

<><><>